



UKA 2024/54

24/10-2024

Anna Wangenheim

Inatsisissatut siunnersuutinik suliaqartarneq pillugu malitassiat atuuttut allanngortinneqarnissaat pillugu Naalakkersuisut peqquneqarnissaannik Inatsisartunut aalajangiiffigisassatut siunnersuut, taamaalilluni inatsisissatut siunnersuutip nassuaataani, nunat tamat akornanni pisussaaffinnut nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersummi nassuaasiortoqartassalluni, tassani immikkut inuit pisinanatitaaffiinut aamma nunap inoqqaavisa pisinnaatitaaffiinut tunngatillugu. Naalakkersuisut suleriaasiat nutaaq ulloq 1. januar 2025 atuutilissaaq.

(Inatsisartunut ilaasortaq Mariane Paviaisen, Inuit Ataqatigiit)

(Siullermeerneqarnera)

Qujanaq Inatsisartunut ilaasortaq Mariane Paviaisen siunnersummut.

Demokraatit isumaqarput, ullumikkut pitsaasumik inatsisiliortaaseqareersugut, inatsisissatut siunnersuutit tamarmik suliarineqarnerminni kingunerisinhaasai tamarmik kalluarneqartarlutik soorlu assersuutigalugu pisortanut aningaasaqarnikkut kingunerisinhaasai, innuttaasunut aammalu namminersorlutik inuussutissarsiortunut. Aamma assersuutitut silaannaap allanngoriartorneranut kingunerisinhaasai nassuartinneqartarlutik. Taamatuttaarlu piumasaqataavoq, piffissamik tusarniaanermik peqassasooq, kikkut tamarmik inatsisissatut siunnersummut isummersorsinnaallutik.

Uuminnga siunnersuuteqarnermini siunnersuuteqartup kissaatigaa, inatsisissatut siunnersuutit aamma nassuaaserneqartassasut nunani tamalaani pisussaaffitsinnut kingunerusinnaasunik tassani pingartumik inuit pisinnaatitaaffiinut aammalu nunap inoqqaavisa pisinnaatitaaffiinut.

Tamanna Demokraatiniit ajoriffissaqartinngilarput. Kisiniannili taamaaliortuaannaratta sukumiisumik eqqarsaatigeqqaartariaqarparput taamatut isummernerup suut kingunerisinhaanerai. Siunnersuutip ilimanarpoq kingunerissagaa, inatsisissatut siunnersuusiortarnerup akisunerulernissaa sulisoqarnikkut aningaasatigullu. Kingunerissavaa, pisortat allaffeqarfianut aningaasartuutit qaffannerat. Tamannami, partiit tamarmik akerlerigaluarpaat. Pisortat allaffeqarfiata annertusinerata politikkikkut aningaasaqarnikkullu namminiilivinnissarput ungasillartuaannassavaa. Demokraatini ima suliniartarpugut, pingaarutilinnik tunngavissaqarpat aatsaat, aalajangernernut peqataassasugut, allaffisornermut aningaasartuutinik qaffaatissanut.

Tamanna tunngavigalugu uagutsinnut pingartuuvoq, ataatsimiititaliami suliniarnissami annertuumik ukkatarineqassasoq, uuma siunnersuutip pisortat allaffisornerannut aningaasartuutinut qaffaassutaanissa. Tamanna qulaajarneqareerpat isummissaagut, siunnersuut tapersissanerlugu.

Taamatut oqaaseqarluta siunnersuut inatsisit atuutsinnejarnerannut ataatsimiititaliamut innersuupparput.